

臺灣文獻史料叢刊

第九輯

重修臺郡各建築圖說
(全)

臺灣大通書局印行

臺灣文獻叢刊第二八三種

重修臺郡各建築圖說

蔣元樞

建設臺邑望樓圖說（圖一三）

查臺邑雖附郡郭，而四郊所至，俱屬荒陬。自西至海五里，東至羅漢門莊外門六十里，南至二贊行溪與鳳邑交界二十一里，北至新港溪與諸邑交界二十里。在城，則分東安、西定、寧南、鎮北四坊；在鄉，則分新昌、仁德、文賢、依仁等十六里。其里內之蔦松脚、隙仔口、喜樹仔、角帶圍、土地公崎、崗山、石門坑、梨仔坑尤臨溪負險，爲奸匪伏莽竊發之所。相其形勢，其要害計二十六處；四圍築石爲牆——各高八尺，環以雉堞。中設望樓，高五尺餘；樓下各蓋草寮，以避風雨。鄉人俱踴躍趨事，按日輪巡，鳴鑼擊柝；有警則各樓響應，四面截擊（原文誤擊），賊無倖脫：蓋亦明斥（原文誤斥）堠於鄉逐、嚴守望於井疆之遺意也。

建設鳳邑望樓圖說（圖一四）

鳳山縣，在郡南七十餘里。其縣治之東至傀儡山五十里，西至打鼓山旗後港十里，南至枋寮口、南勢埔八十五里，北至臺邑界之二贊行溪五十五里：通計所轄四百四十五里。其港西，則分長治、維新、文賢、嘉祥、仁壽、大竹、小竹、觀音爲八保；其港東，則大路關、犁頭鏢各莊，俱逼近傀儡番界。港西之大湖、覆金鼎、二濫、坪仔頭與港東之旗尾、高朗朗、阿猴街俱係僻路，宵小潛藏。茲分設望樓十八座，皆倣臺邑之制。

建設諸邑望樓圖說（圖一五）

諸邑，距郡北百二十里。其南與臺邑之新港交界，北至彰邑之虎尾溪六十里，西至海四十里，東至山二十里。所轄善化、新化、安定、茅港……共三十餘保，地多曠僻；而白沙墩、八漿溪、大崙脚、斗六門，尤爲險要。茲分設望樓五十一座，星羅碁布，實資裨益。

建設彰化縣望樓圖說（圖一六）

彰化縣，距郡北二百三十里。其南與諸邑虎尾溪交界，北至淡水之大甲溪三十里，西至海二十里，東至山三十里。所轄東西螺、南北投、水沙連等十六保；其上下半治莊、湳仔莊、三家春、林圯埔、大里杙（原文爲杙）、大坪頂、阿密母等處，傍水依山，尤爲盜藪。茲分設望樓四十八座——周圍石牆，各高丈二，實以土，砌磚樓於其上；較臺、鳳、諸三邑，更稱完固。於是奸匪斂跡，民賴以安。

建設淡水廳望樓圖說（圖一七）

淡水廳，居臺郡之極北。南與彰化大甲溪爲界，北至雞籠城，西至海二里，東至山五里。自大甲而北，地極荒涼，防禦尤宜嚴謹。茲分設望樓二十五座，其規制更勝於彰化；而派丁輪巡，則與各縣相同。

伏思海外遐陬，敷治匪易；而惠保民生，首宜弭盜。是以元樞悉心熟籌，督率廳、縣建造各望樓；蓋冀海表肅清、民歌安枕，慶苞桑之永固，以仰副委任海外之重寄。分繪五圖，按幅而稽；則全臺之山川形勢，亦可瞭如指掌矣。

鼎建傀儡生番隘寮圖說（圖一八）

查臺灣南北二路，各有生番。北路地廣山深，番離莊遠，又設「土牛」隘口；層層巡警，歷年安靜。南路之傀儡生番，最稱兇狠。且沿山居民逼近番界，約計二百餘莊。從前限以山根溪溝爲界，雖設武洛、新東勢、山猪毛、枋寮口、糞箕湖、巴陽莊等六隘，撥番分住巡守；但所撥之番爲數無多，又無隘寮居住，其勢自不能常川守衛。且今昔情形不同：前此生番出沒之處，今則番跡罕到；前者從未出沒之區，今則有路可通——如雙溪口、大路關、毒口溪等處是也。情形異昔，法宜變通。元樞前巡南路，細察情形，殊失扼要。現雖生番安靜，萬一遇有越界之事，備禦宜周。因就山脚遍勘，於生番出沒之處添建隘寮、酌移舊隘，添撥番丁連眷同住，永資捍衛；稟蒙大憲批允辦理。隨經示諭，衿民樂從；捐銀輸料，爭先恐後。謹委專員會同營弁慎選董事，督同興建。除舊有之糞箕湖、巴陽莊、新東勢等四隘仍照舊址改建外，其山猪毛隘移建於雙溪口、武洛隘移建於加臘埔、枋寮隘移建於毛獅獅，並添建大路關、毒口溪等三隘，共計十座。外則砌築石牆，闊五尺，高八、九尺及一丈不等，周圍約計一百二十丈及一百四、五十丈不等。中蓋住屋五、六十間，亦有八、九十間者，俱照社番居屋建蓋。仍撥鳳邑所轄之阿猴、武洛、上淡水、下淡水、搭樓、茄藤、力力、放練等八社熟番住守，並按地勢之

險夷、酌派番丁之多寡，連眷同居，以堅其志。附隘埔地，聽其墾種，以資衣食；分立界址，以杜佔爭。隘寮之後，另建寮房六所；周圍以木爲柵，柵內蓋屋四、五、六十間不等。令生番通事攜帶壯丁守禦，與熟番互爲聲援。又令近山居民：大莊則設望樓二座、小莊一座；每樓派三、四人，日則遠眺，夜鳴鑼柝。每月自朔至晦，預期派定，大書望樓之上，以專責成。如有生番踪跡，卽行鳴鑼；各莊聞鑼，互相救援。現在防禦甚嚴，立法頗備：既分地以裕隘番口食，復豎界以息隘番紛爭。番散難馭，設隘首以歸約束；丁衆難防，住通事以專稽察。且稽查漢奸牽娶番婦，則諸弊可杜；明定生番交易日期，則透漏自絕：實於杜絕生番之中，兼寓防奸除弊之意。

前巡憲視歷南路勘查番界，蒙以元樞籌建隘寮、望樓各事合於機宜，可資扼要；諭以『從前雖以山根溪溝爲界，但山形起伏不一、水溝衝徙無常，日久恐有混淆；應照北路規制，建立「土牛」，俾民番永遠。業已附摺入奏，務須妥速辦理』。兼荷仰述聖諭，以釐定番界爲第一要務。元樞遵卽嚴督鳳邑李令（桐）妥速趕辦，以期上遵聖訓、下惠黎元。自今以後，界址永清，無虞淆混；該番畏守禦之日嚴，自必益臻寧謐，沿山黎庶永慶昇平矣。